



Krus di Mérito 2025

Tópiko: biografia kompilá di nominadonan

SEÑOR ROMEO RAYMOND HEIJE

Nase 24 di mart 1950 na Kòrsou.

Romeo Heije ta un dje kantantenan i músiko mas gustá di Kòrsou. For di 1964 ela kumisá partisipá aktivamente den bida farandulero lokal i a militá den diferente banda musikal entre otro “Los Dandies”, “The Blues” “The Magic Stars”, “Super Speshal Combo”, “Super Dynamic”, “Doble R. Superspecial Stars” i otronan.

Na 1982 pa 1987 Romeo a fungi komo direktor i dosente di skol di músika Band’abou. Na 1988 Romeo a disidí di bai Hulanda pa amplia su konosementu musikal. Entre 1988 i 1991 Romeo a sigui kurso na Conservatorium na Arnhem unda ku ela speshalisá su mes den músika pa skol i kanto engeneral i a logra kaba su estudio di HBO komo dosente. Despues di su estudio el a traha na Hulanda komo guiado den proyektonan pa personanan ku ta yega nobo pa integrá nan mes (PIN) i tambe guiado di trayektonan na Hellevoetsluis na 1991 pa 1995 (V.I.P.)

Despues di Romeo su regreso pa Kòrsou el a bira e lider i kordinadó di e proyekto musikal soshal na internat Kas pa Hubentut na Soto unda na 1997 el a kordiná e bishita di prens Willem Alexander. Aparte di esei el a traha tambe komo dosente di músika na Akademia Pedagógiko di 1997 pa 2002. Romeo ta traha na fundashon SIFMA komo dosente di kanto. Romeo a duna lès di músika i kanto den sentro di barío Souax kaminda ku te awe e ta aktivo. Romeo a duna les na Fundashon Pro Bista i a desaroyá dos dokumento ku método pa guia dosentenan ku ta duna lès na klientenan ku limitashon visual.

Despues di baha ku penshun na 2010, Romeo e a keda aktivo komo boluntario den e sektor musikal. Sigur den e area Musikal, Romeo ta un ehempel stimulatibo pa otronan ku maske bo por tin un òf otro limitashon fisikó, esei no mester ta un estorbo pa bo logra meta. Ku determinashon i perseveransha bo ta logra.



Krus di Mérito 2025

Tópiko: biografia kompilá di nominadonan

SEÑOR HAROLD EUSTAQUIO CORASOL

Nasé: 2 di novèmber 1942 na Kòrsou.

Señor Harold Corasol ta un lider konosí na Kòrsou ku ta kapasitá entre otro komo trahadó sosial, ku un bida kompleto dediká na e komunidad di Kòrsou.

Despues di su estudio komo dosente na 1961 e a kuminsá un karera komo dosente na Canisius College na Steenrijk.

Na 1967 señor Harold a drenta servisio komo dosente di Franses i Historia na Monseñor Zwijsen College, kaminda e a traha su nòmber komo un dosente ku semper ta kla pa yuda tantu su alumnonan komo koleganan. Su kualidatnan komo lider a guia ku a nombr'é komo direktor di e skol akí. Bou di su guia e skol a krese enormemente ku énfasis riba disiplina, traha huntu i aktividatnan kultural. Señor Harold tabata atendé tambe ku produkshonnan teatral eksitoso manera “Esta Riku nos bida ta” i “A nase un mas” ku a hasi un impakto den e mundu di enseñansa. Banda di su karera komo dosente Harold tabata hopi aktivo den komunidad. El a pone su skoudernan bou di koperativa pa dosentenan, zeeverkenners i diferente otro inisiativa kultural.

Den e sektor kultural señor Harold a partisipá den “Nos Kousa”. Esaki tabata un organisashon dirigí riba obranan teatral ku temanan sosial. Un dje grandinan tabata e komedia “TULA” ku huntu ku señor Pacheco Domacasse (q.e.p.d.), a keda produsí bou di direkshon di e famoso Henk van Ulzen.

Tambe Harold a yuda un grupo ku yama “Yukondro” ku tabata sostené i yuda esnan ku tabata adikto na droga. Un dje kontribushonnan importante tambe di señor Harold ta su yudansa te ainda den Fundashon Nos T’ei pa Yuda. E organisashon akí ta yuda esnan ku no tin dak riba nan kabes i tambe drogadiktonan.



Krus di Mérito 2025

Tópiko: biografia kompilá di nominadonan

SEÑORA ELLA ZACARIAS SNIJDERS

Nase 6 di sèptèmber 1957 na Kòrsou.

Ella Snijders, pa esfuerso personal, personalidat amistoso i determinashon, a logra bira un boluntario ehemplar den nos komunidad. Durante di su estudio na Maria Immaculata Lyceum ya e tabata un boluntario aktivo den diferente organisashon di hóben prinsipalmente den e bario di Buena Vista. Despues di su estudio ela kumisá su karera na NCR, siguidamente un funshon na Ernst & Young. Aki ela speshalisá su mes den e área di maneho finansiero, komunikashon i maneho di personal.

For di 2015 Ella ta aktivo komo boluntario na e fundashon “Slachtofferhulp” Curacao (SSHC) awor konosí komo UOJZ. El a traha ku klientenan difísil i funerabel ku tabata yega pa yudansa ku hopi biaha ta viktimá di delitonan manera problemanan relashonal, abuso seksual of víktima den tráfico. Su dedikashon ehemplar ku ta inserá duna guiansa emoshonal i asistí klientenan den korte yudando ku formulashon di rapòrt di daño perhuisio i proseduranan hurídiko. Esaki e ta hasi ku un pasenshi enorme demostrando empatia i su abilidadat di skucha sin husga .

Durante dje pandemia di COVID-19, Ella a pone su mes disponibel pa yuda den akshonnan pa haña kuminda via banko di kuminda. Apesar dje situashonnan difísil tòg Ella a sigui yuda inkansablemente den nos komunidad yudando riba diferente tereno entregando paketenan di kuminda i duna sosten durante situashonnan krítiko. Tambe Ella a okupá su mes ku e organisashonnan manera Fundashon Special Olympics i “Antilliaanse Jongens en Meisjes Gilde (AJMG).



Krus di Mérito 2025

Tópiko: biografia kompilá di nominadonan

SEÑOR RUTHSEL GREGORIO MARTINA

Nase 12 mart 1956 na Kòrsou.

Ruthsel Martina ta un figura prominente den e mundu di deporte di Kòrsou i tambe den eksterior. Dor di su konosementu tekniko el a kuminsá su karera profeshonal na Aqualectra na 1971 kaminda ku finalmente ela krese bira kordinadó di kamber di kontròl i di servisio di “Storing”. Su disiplina fuerte ku e tin i kualidatnan pa lidera a keda desaroyá temporada ku e tabata militá den Jonge Wacht komo hóben, loke a kondusí na un base fuerte p’e komo lider i coach den e mundu di atletismo.

Bou di guia di coach Norwin Martina, Ruthsel a speshalisá su mes den korementu di distansia largu . Ta for di na su 16 aña el a kumisa train di ku tur seriedat den atletismo. Ruthsel a eksalá den diferente disiplina i a logra resultadonan impaktante durante kompetensianan lokal i internashonal. Ruthsel a representá Kòrsou i Antia durante diferente torneonan internashonal entre otro Weganan di Reino na Surinam, Venezuela, Mexico, Barbados, Trinidad i den Carifta Games na Puerto Rico.

Na 1989 Ruthsel a lanta e klub di Atletiek Trupial ku a establese mas den e bario sta.Rosa i Bonam. Loke ku a kumisá komo un klup di bario a krese bira un dje klupnan di Atletismo mas eksitoso di Kòrsou. Bou di su guia e klup a gana diferente premio i a partisipá den diferente kompetensia regional i internashonal. Ta for di Trupial a sali atletanan hóben ku a bin ta destaká i saka kara di Kòrsou. Entre nan nos Churandy Martina ku a bira un strea Mundial i Lei – Marven Bonifacia. Pa motibu di Ruthsel su pashon i deseo di amplia konosementu den Atletismo el a profundisá su mes den esaki logrando entre otro su sertifikado di IAAF nivel 4 .



Krus di Mérito 2025

Tópiko: biografia kompilá di nominadonan

SEÑORA YVETTE ELISABETH ROJER

Nase dia 5 di yüni 1953 na Kòrsou.

Yvette Rojer a dediká su bida na atletismo aki na Kòrsou i tambe riba plano internashonal. Di 1983 te ku 2003 el a representá Antia den kampionatonan grandi internashonalmente. Yvette mes praktikando e deporte di Basketball, a sa di respresentá Antias na entre otro Juegos Centro Americano i Del Caribe na Medellin i tambe Panamerikano na Panama.

Despues ku a disolve Antia na 2010, Yvette a keda aktivo internashonalmente den deporte di atletismo i a guia e atletanan i ekiponan durante torneonan na entre otro Venezuela, Mexico, Puerto Rico i islanan Ingles den Caribe.

Yvette a start ku su karera komo coach na 1982 dunando training na atletanan hóben den e organisashon The Eagles ku e mes a yuda lanta.

Na 1988 Yvette a logra su sertifikado di IAAF na Puerto Rico ku a habri portanan internashonal kaminda e por a fungi komo coach riba nivel haltu. El a keda desaroyá su mes pa medio di partisipá (na 1990) na un curso speshal di Special Olympics na Jamaica. Yvette a keda komo coach di Special Olympics di 1989 te 2008 kaminda ku ela dediká su mes di duna muchanan speshal training pa por kompetí i presta riba nivel haltu.

Internashonalmente tambe Yvette a guia atletanan durante kompetensianan di Carifta Games di 1984 te 2010 na Bahamas, Barbados i Jamaica. Aparte di esei e tabata coach tambe den kampionatonan na Hulanda, Bélgika i Alemania di 1997 te 2007.
